



Inatsisartunut ilaasortaq
Debora Kleist Inuit Ataqatigiit

Atuartut angerlarsimaffiannut tunngatillugu § 37 naapertorlugu apeqqutip nr. 136-ip akineqarnera

22-05-2017
Sagsnr. 2017 - 10401
Allakkat nr. 5367720

Asasara Debora Kleist,

Postboks 1029
3900 Nuuk
Oqarasuaat: +299 34 50 00
Fax.: +299 32 20 73
Email: IKIIN@nanoq.gl
www.nanoq.gl

Inatsisartut suleriaasiat naapertorlugu apeqqutinnut qujanaq. Apeqqutigineqartut tullinnguuttuni akissavakka.

Apeqqut 1: Nunatsinni meeqqanut atuartunut atuartut angerlarsimaffianniittunut perorsaanikkut (pædagogiskemik) suliaqarnermi kiisalu illutatigut pitsaassusissamut ataatsimut isigalugu Naalakkersuisut qanoq isummeqqappat?

Akissut: Naalakkersuisut tunngaviatigut isumaqarput nunatsinni atuartut angerlarsimaffiini illutatigut perorsaanikkullu atugassarititat atuartut inuulluarnissaannut ilinniarnissaannullu kiisalu angajoqqaat qitornaminnik atuartut angerlarsimaffimmukartitsinerminni tapersersorneqarnissaannut toqqissimanissaannullu pingaaruteqarluinnartuusut. Naalakkersuisuttaaq isumaqarput atuartut angerlarsimaffiini atugassarititat meeqqat atuarfiat pillugu inatsimmi ilaatigut ilinniarfinni peqqissuunissap toqqissimanissallu qulakkeernissaannut siunertarineqartumut naapertuuttuusariaqartut. Naalakkersuisut isumaqarput atuartut angerlarsimaffii perorsaaneq eqqarsaatigalugu assigiinngitsorujussuarmik ingerlanneqartut, illuutitigullu atugassarititat aamma allanngorartut isumaqarfigineqarlutik, tamakkulu pissutigalugit Naalakkersuisut atuarfik pillugu Inatsisartut inatsisaannut allannguutissatut siunnersuummik saqqummiussinialersaarmata. Aammattaaq takuuk apeqqutigineqartunut 2-mut akissutit.

Apeqqut 2: Meeqqanut inuusuttunullu illutatigut perorsaanikkullu pitsaassutsip annikinnerpaaffissaanut Naalakkersuisut piumasaqaateqalersaarpat, tassa nalunaarut sukumiisoq "Skolehjemmet pillugit nalunaarut – nunaqarfinni atuarfinniit illoqarfinni atuarfinnut ikaarsaarnerni isumaliuutit inassuteqaatillu" ilaatigut eqqarsaatigalugu?

Akissut: Naalakkersuisut ilaatigut "Atuartut angerlarsimaffii pillugit Nassuiaat" tunngavigalugu isumaqarsimapput atuartut angerlarsimaffiinut tunngatillugu suliniutinik aallartitsisoqarnissaa pisariaqartoq. Taamaammat tassunga tunngatillugu atuarfik pillugu Inatsisartut inatsisaata allanngortinnissaanut siunnersuummut atatillugu § 25-ip allanngortinnissaanut, ukiakkullu ataatsimiinnermi suliarineqartussatut ilimagineqartumut atatillugu, qanittumilu

tusarniaatigineqartumut tunngatillugu, Naalakkersuisut siunnersuuteqarsimapput atuartut, atuartut angerlarsimaffiiniinnissaannut ilinniartullu ineqarfinniinnissaannut malittarisassanik sukumiinerusunik minnerpaamillu piumasaqarsinnaanermut Naalakkersuisut tunngavissinneqassasut.

Naalakkersuisut Ilinniartitaanermut Aqutsisoqarfimmut qinnuiginnissimapput kommunit suleqatigalugit suliassaqarfimmik misissueqqullugit, siunertarineqarporlu § 25-mik allanngortitsinerup akuersissutaareernerata kingornagut atuartut angerlarsimaffiinit suliassaqarfimmut malittarisassiorluni piumasaqaatinullu minnerpaaffiliilluni nalunaarummik suliaqartoqalernissaanik piareersaaqqullugit, tamatumani Namminersorlutik Oqartussat kommunillu atuartut angerlarsimaffiinit nakkutilliinissaat tunngavissinniarlugu.

Apeqqu 3: Nalunaarut qulaani pineqartoq naapertorlugu atuartut angerlarsimaffiini perorsaanikkut illutatigullu pitsaassutsitigut minnerpaatut piumasaqaateqarnissap qulakkeernissaanut suut pisarialittut iliuuserineqarsinnaappat?

- a. Illutatigut perorsaanikkullu pitsanngorsaassagaanni aningaasartuutissat qanoq isikkoqassappat?
- b. Perorsaanikkut illutatigullu pitsanngorsaasoqassappat aningaasartuutissat kikkunnit isumagineqassappat?

Akissut: Soorlu siuliani apeqqu 2-mi taaneqareersoq paragrafimik tunngavissisussamik pisariaqartitsisoqarpoq, taamaalillutik Naalakkersuisut kingusinnerusukkut suliassaqarfimmut malittarisassanik sukumiinerusunik suliqaarsinnaaqqullugit. Illutatigut atugassarititanut tunngatillugu atuartut angerlarsimaffiisa iluarsarnissaannut aserfallatsaaliornissaannullu pilersaarummik suliaqartoqassaaq, soorluttaarlu kommunit ataasiakkaat namminneq atuarfeqarfimminni ilusilersuinissaq nutaanik sanaartortoqarsinnaanera isummerfigitinnagu naggammik aalajangiiffigeqqaartussaagaat.

a: Atuartut angerlarsimaffiini naammagineqarsinnaasumik illutatigut perorsaanikkullu atugassaqaarfiusuni minnerpaaffiliinissamut piumasaqarnissat akuerineqarsinnaasut qulakkeerniarneranni allanik aningaasartuuteqartoqassanngilaq. Atuartut angerlarsimaffiini perorsaanikkut atugassarititigut minnerpaaffiliinissamut piumasaqaatinngortussanut naammassinniffiusinnaanngitsuni sulisussat piukkunnaatillit pisariaqartinneqassagunarput, taamaalillunilu aamma aningaasartuuteqarnerusoqarsinnaalluni. Pisariaqartitsisoqarnera, taamaalillunilu aningaasartuuteqartoqarsinnaanera Naalakkersuisut massakut ilisimasaqarfiginngilaat. Illutatigut atugassarititat akuerineqarsinnaasut qulakkeernissaannut atatillugu aningaasartuutaajunnartut massakut kisitsisinnngortinneqarsinnaanngillat. Qanoq issutsimut naliliinermi 2011-meersumi aningaasartuutissat 160 aamma 230 mio. kr.-nit akornanniittussat missingiiffigineqarsimapput, ukiunili qaangiuttuni nutaanik sanaartortitsinerit, iluarsaanerit aserfallannerillu aqusaagaasimapput, taamaammallu 2017-imi aningaasartuutinngortussat 2011-mi qanoq issutsimut nalunaarsuisimanerit misissoqqinnissaannik pisariaqartitsisussaapput.

b: Perorsaanikkut atugassarititigut qaffassaasoqarniarpat tassunga aningaasartuutinngortussat kommuninit isumagineqartussaapput, tamannalumi aamma illutatigut atugassarititanik pitsanngorsaasoqarniarpat atuuppoq,

isaterisoqarniarpallu taakkununga aningaasartuutit sanaartoqqinnissallu
Namminersorlutik Oqartussanit isumagineqartussaallutik.

**Apequt 4: Atuartut angerlarsimaffiini sulisut ilinniagaqarsimassusaannut
tunngatillugu Naalakkersuisut kommunit peqatigalugit
misissuinialersaarpat?**

Akissut: Atuartut angerlarsimaffiinit minnerpaaffittut piumasaqarnissami
ilusilersuinissanut kommuninik oqaloqateqartarnermut atuartut angerlarsimaffiini
sulisut ilinniakkamikkut qaffasinnerusumik angusaqarsimanissaannut
misissuisoqassasoq Naalakkersuisut naatsorsuutigaat.

Inussiarnersumik inuulluaqqusilluta


Doris Jakobsen